



ՍՐԲԱԼՈՒՅՍ ՄԵՌՈՆԻ ՕՐՀՆՈՒԹՅՈՒՆ ՄԱՅՐ ԱԹՈՒ ՍՈՒՐԲ ԷԶՄԻԱԾՆՈՒՄ

Արդեն նվիրական ու ավանդական դարձած մեռոնօրհների սրբազան արարողությունը ահավասիկ 1700 տարիներից ի վեր բովանդակ հայության միասնական աղոթքի ու հոգևոր ուխտի նորոգման խորհուրդն է դարձել: Մեռոնօրհնությունը հայ հավատացյալ ժողովրդի հոգու և սրտի ամենամոտ ազգային-եկեղեցական տոնախմբությունն է, որին ներկա է եղել մեր ժողովուրդը հոգեկան ուրախության հույզերով և ազգային հպարտության զգացումներով:

Առաջին անգամ այս սրբազան հողի վրա, հավանաբար 303 թ., Ս. Գրիգոր Լուսավորիչն է, որ օրհնել է սրբալույս մեռոնը Արշակունի Տրդատ Գ. հայոց արքայի կնքահայրությամբ: Այնուհետև դարերի ընթացքում Ս. Լուսավորչի արժանավոր հաջորդները միշտ օրհնել են սուրբ մեռոնը, որպեսզի երբեք ու երբեք Հայ Եկեղեցում և հայ հոգիների մեջ «չցամաքի ձեթը մաքուր իր կանթեղին, հոգիներին՝ սրբազան հուր»:

Ահավասիկ այս հանդիսավոր առիթով Մայր Հայրենիքը իր դռները բացեց բազմահազար հավատավոր հայորդիների առջև: Եվ ահա այսօր էլ հայ ուխտավորներն աշխարհի բոլոր կողմերից եկել են Ս. Էջմիածին, Մայր Հայրենիք՝ իրենց հետ բերելով բյուր կարոտներ, կրոնական ու հայրենասիրական հույզ ու ապրում:

Աշխարհի տարբեր երկրներից ուխտավորաբար Մայր Աթոռ Ս. Էջմիածին են ժամանում Հայաստանյայց Եկեղեցու թեմակալ առաջնորդներ, հոգևոր ներկայացուցիչներ, թեմական և եկեղեցական վարչությանց անդամներ, Մայր Աթոռի բարերարներ, ազգային-հասարակական գործիչներ, բույր Եկեղեցիների ներկայացուցիչներ և այլ հյուրեր: Նրանք գալիս էին հաղորդակից լինելու մեռոնաբույր Ս. Էջմիածնով մեր նախնիների սուրբ հոգիների հետ, գալիս էին տեսնելու Հայաստանի ինքնիշխան հանրապետության վերածնունդը և միասնաբար աղոթելու մեր Եկեղեցու և Մայր Հայաստանի շինության ու անասանության համար:

Ս. Էջմիածինը իր պանդուխտ զավակներին կանչել է իր հովանու ներքո, իր մայրական գորովագութ գիրկը՝ իր մեռոնաբույր օրհնությունն ու աղոթքը բաշխելու համասփյուռ հայությանը:

1991 թ. սեպտեմբերի 21-ից մինչև 25-ը սրբալույս մեռոնօրհնության համազգային հանդիսությանը մասնակցելու համար Մայր Աթոռ Ս. Էջմիածին եմ ժամանում Երուսաղեմի հայոց Պատրիարք Ամենապատիվ Տ. Թորգոմ արքեպս. Մանուկյանը՝ ընկերակցությամբ Տ. Սևան եպս. Ղարիպյանի, Կ. Պոլսո հայոց Պատրիարք Տ. Գարեգին արքեպս. Գազանճյանը՝ ողնկցությամբ Տ. Ծաֆան եպս. Սվաճյանի, Տ. Մանվել վրդ. Երկաթյանի և Տ. Պարույր քնն. Դամատյանի: Մեռոնօրհներին իրենց մասնակցությունն էին բերել նաև ԱՄՆ-ի հայոց արևելյան թեմի առաջնորդ Տ. Խաժակ եպս. Պարսամյանը, ԱՄՆ-ի հայոց արևմտյան թեմի առաջնորդ Տ. Վաչե արքեպս. Հովսեփյանը, Ռումինիայի և Բուլղարիայի հայոց թեմի առաջնորդ Տ. Տիրալ արքեպս. Մարտիկյանը, Եգիպտոսի հայոց թեմի առաջնորդ Տ. Զավեն արքեպս. Չինչինյանը, Հունաստանի հայոց թեմի հայրապետական պատվիրակ Տ. Ոսկան եպս. Գալիաքյանը, Իրաքի հայոց թեմի առաջնորդ Տ. Ավագ եպս. Ասատուրյանը, Ավստրալիայի և Նոր Զելանդիայի հայոց թեմի առաջնորդ Տ. Աղան եպս. Պալիոզյանը, Կանադայի հայոց թեմի առաջնորդ Տ. Հովման եպս. Տերտերյանը, Արգենտինայի հայոց թեմի առաջնորդ Տ. Գիսակ եպս. Մուրադյանը, Ուրուգվայի հայոց թեմի առաջնորդ Տ. Հակոբ եպս. Գլըընճյանը, Բրազիլիայի հայոց թեմի առաջնորդ Տ. Տաթև եպս. Մուրատյանը, Ֆրանսիայի հայոց թեմի առաջնորդ և հայրապետական պատվիրակ Տ. Գյուտ արքեպս. Նազաշյանը, Լիոնի հայոց առաջնորդ Տ. Նորվան եպս. Զաքարյանը, Կենտրոնական Եվրոպայի հայրապետական պատվիրակ Տ. Մեսրոպ եպս. Գրիգորյանը:

Ներքին թեմերից հանդիսություններին մասնակցում էին Արարատյան հայրապետական թեմի առաջնորդական փոխանորդ Տ. Գարեգին եպս. Ներսիսյանը, Ծիրակի թեմի առաջնորդ Տ. Գրիգորիս եպս. Բունիաթյանը, Գուգարաց թեմի առաջնորդ Տ. Արսեն եպս. Բերբերյանը, Սյունյաց թեմի առաջնորդ Տ. Ասողիկ եպս. Արիստակեսյանը, Արցախի թեմի առաջնորդ Տ. Պարգև եպս. Մարտիրոսյանը, Վրաստանի հայոց թեմի առաջնորդ Տ. Գևորգ եպս. Սերայտարյանը, Նոր Նախիջևանի և Ռուսաստանի հայոց թեմի առաջնորդ Տ. Տիրան եպս. Կյուրեղյանը, Մայր տաճարի լուսարարապետ Տ. Հուսիկ արքեպս. Սանթուրյանը, Մայր Աթոռի դիվանապետ Տ. Ներսես արքեպս. Պոզապալյանը, Ս. Հոփիսիմե վանքի վանահայր Տ. Ամանիա եպս. Արաբաշյանը:

Հրավիրյալների թվում էին՝ Երուսաղեմից՝ Տ. Ծաֆե արքեպս. Աճեմյանը, Ծվեցարիայի հայոց հոգևոր հովիվ Տ. Վիգեն ծ. վրդ. Ալվազյանը, Իտալիայի հայոց հոգևոր հովիվ Տ. Սարգիս քնն. Սարգիսյանը, ԱՄՆ-ի հայոց արևելյան թեմից Տ. Արիս եպս. Ծիրվանյանը, Տ. Հակազուն ծ. վրդ. Մելքոնյանը, Գ. Գրիգոր քնն. Հայրապետյանը:

Ամենայն Հայոց Հայրապետի մասնավոր հրավերով մեռոնօրհներին սրբազան արարողությանը մասնակցելու համար Մայր Աթոռ էր ժամանել Մեծի Տանն Կիլիկիո Գարեգին Բ Կաթողիկոսը՝ ընկերակցությամբ Տ. Սեպուն ծ. վրդ. Սարգիսյանի և Տ. Արշավիր վրդ. Գաթուշյանի:

Հանդիսությանը մասնակցող քույր Եկեղեցիների պատվիրակության մաս էին կազմում Ռուսաց Եկեղեցու, Վրաց Եկեղեցու և Հոռոմեական Կաթոլիկ Եկեղեցու ներկայացուցիչները:

ԿԻՐԱԿՆԱՄՈՒՑԻ ԺԱՄԵՐԳՈՒԹՅՈՒՆ ՄԱՅՐ ՏԱՃԱՐՈՒՄ

Սեպտեմբերի 28-ին, շաբաթ օրը, երեկոյան ժամը 18-ին, Հայ Եկեղեցու նվիրապետական Աթոռների գահակալները, եպիսկոպոսաց դասը, վարդապետներն ու քահանա հայրերը, Հայոց Հայրապետի գլխավորությամբ, եկեղեցական թափորով, ուխտավորների ու հավատացյալների խոռոներամ բազմությամբ առաջնորդվեցին Մայր տաճար՝ մերկա լինելու կիրակնամուտի հանդիսավոր ժամերգությանը:

ՍՐԲԱԼՈՒՅՍ ՄԵՌՈՆԻ ՕՐՀՆՈՒԹՅՈՒՆ

Սեպտեմբերի 29-ին, կիրակի: Այսօր Ամենայն Հայոց Հայրապետը մեծաշուք հանդիսավորությամբ, իր գահակալության 36-րդ տարում, վեցերորդ անգամ կատարում է սրբալույս մեռոնի օրհնությունը՝ ի վայելումն Հայաստանյայց Առաքելական Եկեղեցու և հավատավոր հայ ժողովրդի:

Քառասուն օրեր առաջ Մայր Աթոռում սկսվել էր սրբալույս մեռոնի պատրաստությունը: Մեռոնի արծաթաձուլ մեծ կաթսան, լցված ձիթապտղի անարատ յուղով, դրվել էր Ավագ խորանում ամենօրյա «աղօթիւք և երգօք հոգևորօք» և ծածկվել «յոթն շղարշովք»:

Վաղ առավոտից հազարավոր հայ ուխտավորներ և հավատացյալներ արտերկրից և Հայաստանի տարբեր շրջաններից եկել են մասնակցելու համազգային այս սրտահույզ ու գեղեցիկ արարողությանը:

Մինչև մեռոնօրհների արարողությունը, առավոտյան ժամը 10-ին, Մայր տաճարում, Ավագ ա. խորանի վրա, հանդիսավոր սուրբ պատարագ է մատուցում Կ. Պոլսի հայոց Պատրիարք Ամենապատիվ Տ. Գարեգին արքեպս. Գազանճյանը:

Ա. պատարագի արարողությունից հետո եկեղեցական մեծահանդես թափորը, սկիզբ առնելով Վեհարանից, ձգվում է դեպի Մայր տաճարի առաջ պատրաստված բեմը:

Քահանայապետական լրիվ զգեստավորման մեջ եկեղեցական թափորը գլխավորում է Ամենայն Հայոց Կաթողիկոսը՝ շրջապատված Մեծի Տանն Կիլիկիո Կաթողիկոսով, Տ. Թորգոմ և Տ. Գարեգին Սրբազան Պատրիարքներով, որոնք տոնական և հանդիսավոր զգեստավորված են իրենց դիրքի և պաշտոնի համաձայն, ինչպես նաև 12 եպիսկոպոսներով ու արքեպիսկոպոսներով, որոնք մասնակցելու են սուրբ մեռոնի օրհնությանը:

Թափորի առջևից ընթանում են կարմրազգեստ, ջլապինդ երկու ջաթիրները՝ արծաթագլուխ գավազաններով: Նրանց հետևում են ջահակիրները, որից հետո գալիս են հոգևոր ճեմարանի ուսանողները, շուրջառագեստ վարդապետներն ու քահանա հայրերը: Թափորի կենտրոնում երկու վարդապետներ կրում են խաչվառն ու հայրապետական գավազանը, իսկ երկու սարկավազներ՝ ա. մեռոնի կաթսայի ոսկեթել երիզներով բանված սպիտակաթույր շղարշը: Նրանց հետևում է սրբալույս մեռոնի օրհնության կնքահայրը՝ Գևորգ Հովնանյանը (Նյու Ջրբգի):

Շքեղազգեստ առաջանում է 12 արքեպիսկոպոսների և եպիսկոպոսների շքախումբը՝ մասունքներով, արծաթապատ Ավետարաններով և այլ սրբություններով: Մեծի Տանն Կիլիկիո Գարեգին Բ Կաթողիկոսը այս նվիրական հանդիսության առիթով կրում է Կիլիկյան Աթոռից բերված մեռո-

նով լի սափորը, Ամենապատիվ Տ Թորգոմ Պատրիարքը տանում է աստվածամուխ Ա. Գեղարդը, Ամենապատիվ Տ. Գարեգին Պատրիարքը՝ Ա. Կենաց փայտը, Ներսես արքեպս. Պողապալյանը՝ Լուսավորչի Ա. Աջը, Տ. Զավեն արքեպս. Չինչինյանը՝ անուշաբույր ծաղիկներով անոթը, Տ. Գրիգորիս եպս. Բունիաթյանը՝ բալասանով անոթը, Տ. Խաժակ եպս. Պարսամյանը՝ հին մեռոնը, Տ. Վաչե արքեպս. Հովսեփյանը՝ Ա. Արիստակես Հայրապետի աջը, Տ. Արսեն եպս. Բերբերյանը՝ Ա. Թադեոսի աջը, Գյուտ արքեպս. Նագաշյանը՝ Ա. Հակոբ Մծբնա Հայրապետի աջը, իսկ Տ. Գարեգին եպս. Ներսիսյանը, Տ. Ադան եպս. Պալիոզյանը, Տ. Գիսակ եպս. Մուրադյանը տանում են արծաթապատ կազմերով Ա. Ավետարաններ:

Վեհափառ Հայրապետը հընթացս օրհնում է բազմահազար հավատացյալներին և ուխտավորներին, որոնք երկյուղածությամբ գլուխ են խոնարհում հայրապետական Ա. Աջի առաջ: Հայոց Հայրապետի աջ և ահյակ կողմերով քայլում են Տ. Ավագ եպս. Ասատուրյանը և Տ. Հովնան եպս. Տերտերյանը՝ որպես փեշակիրներ:

Հայրապետական թափորին մաս են կազմում քույր Եկեղեցիների պատգամավորները, որոնք տեղ են գրավում Հին Վեհարանի առջևում այս առթիվ պատրաստված մասնավոր բեմի վրա: Հարթակի վրա են գտնվում Հայաստանի խորհրդարանի նախագահ Տիար Լևոն Տեր-Պետրոսյանը և պաշտոնական այլ անձինք:

Բեմահարթակի աջակողմյան դասում կանգնած Մայրավանքի երգչախմբի անդամները, Մայր թոռի վարդապետների և սարկավագների հետ միասին, երգչախմբի ղեկավար Խորեն Մեյխանեջյանի գլխավորությամբ, կատարում են մեռոնօրհնության շարականներն ու մեղեդիները:

«Հրաշափառ Աստուած» շարականի վեհ հնչյունների ներքո, Տրդատյան կամարակապ դուռն միջով, եկեղեցական հանդիսավոր թափորը, Վեհափառ Հայրապետի գլխավորությամբ, բարձրանում է զանգակատան առաջ պատրաստված բեմ-խորանի վրա՝ կատարելու սրբալույս մեռոնի օրհնությունը: Նույն պահին վեհ ու հաղթական թնդում է «Ուրախ լեր» շարականը, որ հոգեկան անպատում բերկրանքի ու խնդության հույզերով է համակում բոլորի սրտերը:

Արդարև այսօր ուրախ է Մայր Աթոռ Ա. Էջմիածինը, քանզի ամենուր լույս է, խունկ և աղոթք:


Հայոց Հայրապետը բազմում է «յաթոռ և երկոտասան եպիսկոպոսունք կալով շրջապատ առաջի, ունելով ի ձեռս իրեանց գտորբ նշանն Կենաց, զԱջ Սրբոյ Լուսավորչին և զնշխարս սրբոց և մեռոնաշիջ մի լցեալ հին մեռոնաւ»:

Մեռոնօրհների հոգեհույզ ու սրտահույզ արարողությունը ուղիղ եթերով ցուցադրվում էր հանրապետության հեռուստատեսությամբ:

Սկսվում է սրբալույս մեռոնի օրհնության մեծահանդես արարողությունը: Սրբազան եպիսկոպոսները «Կանոն օրհնութեան սրբալույս մեռոնի» հրահանգի համաձայն Ա. Գրքից կատարում են համապատասխան հատվածների ընթերցումներ սուրբ յուղի պատրաստության հոգևոր, աստվածային նշանակության և նրա գործածության մասին: Այնուհետև Վեհափառ Հայրապետն ընթերցում է մեռոնօրհների մեծ աղոթքը. «Արդ զօրութեամբ ամենասուրբ Հոգւոյդ եղիցի իղս այս՝ իղ ցնծութեան, զգեստ լուսաւոր, օծումն թագաւորութեան, սրբութիւն հոգւոց և մարմնոց, շնորհք հոգեւորական, պահապան կենաց, կնիք արդարութեան, զէն հաւատոյ, նահա-



ՀԱՍՏԱՏՅԱՆ Ժողովուրդի Խորհուրդում բաժնետիրները Հ
ԱՐԲԱՆՈՒՅՑ ՄՅՈՒՄՈՒԻ ՕՇՄԱՆ ՀՈԳԵՊԱՐԱՐ ԱՐԱՐՈՂՈՒ



ՀԱՅԱՍՏԱՆԻ Ժողովուրդի Խորհուրդի Ամենամյա Սեյմի Հրապարակումը
Եւ ժողովուրդի Մարտի 1-ին Դրոշմի Մարտի 1-ին Դրոշմի Մարտի 1-ին

տակ հաղթող ընդդէմ ամենայն գործոց բանասրկութիւն, ոգոց փրկութիւն, ցնծութիւն սրտից, ուրախութիւն յափտեմական, զի որ որ օձցի ի սմանէ՝ վերստին ծննդեան իղովս, երկիւղաց լիցի յԱստուծոյ և աներկիւղ հակառակորդէն»։ Ապա երգեցիկ խումբը մեղմորեն երգում է «Որ յառաջագոյն յօրէնս» մեռոնօրհնության սրտատուշ շարականը, «Մեղեդի մեռոնի՝ Հայր Ամենակալ» տաղն ու Շնորհալու «Նոր օրհնութիւն» քարոզը։ Ապա Մեծի Տանն Կիլիկիո Կաթողիկոսը կարդում է մեռոնօրհնության երկրորդ և երրորդ մեծ աղոթքները։ Այնուհետև «լինի բացումն դրան նիւթոյ մեռոնի»։ Մայր տաճարի լուսարարապետ Տ. Հուսիկ արքեպս. Սանթուրյանը հրավիրում է սուրբ մեռոնի կնքահորը՝ բաց անելու մեռոնի կաթսայի կափարիչը, և հենց այդ պահին էլ դպրաց խումբը ոգևորությամբ եղանակում է «Բացեր, Տէր, այսօր զգանձդ երկնային» շարականը։ Կիլիկյան Աթոռի Գահակալը մոտենում է կաթսային և նրա մէջ լցնում Անթիլիասից բերված մեռոնը։ Ապա Ամենայն Հայոց Կաթողիկոսը հանդիսավորապէս մեռոնօրհնության արծաթյա կաթսայի մէջ է թափում «զնիւթ ծաղկանցն և ապա զբալասանն, և զկնի զհին մեռոնն»։ Այս խորհրդավոր պահը կատարվում է «Առաքելոյ աղանոյ» հոգեցունց շարականի երգեցողության ներքո։ Եվ հենց նույն պահին էլ տոնական հնչում են Մայր տաճարի զանգակատան զանգերը։

Այնուհետև Վեհափառ Հայրապետը Կենաց Ա. Փայտով, Ա. Գեղարդով և Ա. Գրիգոր Լուսավորչի աջով երեք անգամ տեառնագրում և խառնում է նոր մեռոնը՝ երգելով. «Օրհնեցի և սրբեցի մեռոնս այս նշանաւ»։ Մյուս սուրբ մասունքներով ևս տեառնագրվելուց հետո, կաթսան ծածկվում է կափարիչով, և Վեհափառ Հայրապետը կարդում է վերջին աղոթքը. «Արդ, այժմ և մեք պատրաստելով զսա որպէս կաթն մատուցանեմք, զի ամենեքեան որ ի սմանէ առնուցուն՝ արժանի լիցին ընդունել զհաստատուն կերակուր, զճշմարիտն, զերկնայինն՝ ի շնորհաց միածնի քո Տեառն մերոյ Յիսուսի Քրիստոսի...»։


«Եւ այժմ ծագեա ի սիրտս մեր զպարգևս բարութեան Հոգւոյդ Սրբոյ, և հաղորդակից երեսեցո զմեզ պարգևաց քոց սրբոց, վասն զի դու իսկ ես մեռոն անբիծ, և մաքուր և անուշոտ, որ հանապազ բուրեա յանձինս սրբոց քոց»։

Ապա Վեհափառ Հայրապետի «Պահպանիչ»-ով ավարտվում է սրբալույս մեռոնի օրհնության համազգային հանդիսությունը։

Այս նվիրական արարողության ավարտին Ամենայն հայոց Հայրապետն իր ոգեշունչ քարոզն է խոսում՝ վեր հանելով սուրբ մեռոնի հոգևոր խորհուրդն ու իմաստը մեր ազգային գիտակցության մէջ։



Կարդացվում է մեր Տիրոջ՝ Հիսուս Քրիստոսի Ավետարանը



Ումենայն Հայոց Վեհափառ Հայրապետը, Մեծի Տանն Կիլիկիո Գարեգին Բ Կաթողիկոսը, Երուսաղեմի Թորգոմ Պատրիարքը և Կոստանդնուպոլսո Գարեգին Պատրիարքը արբալուս Խյուռոմի օժմանը ներկա եպիսկոպոսական դասի հետ

ԱՄԵՆԱՅՆ ՀԱՅՈՑ ԿԱԹՈՂԻԿՈՍ Տ. Տ. ՎԱԶԳԷՆ Ա.-Ի
ԽՅՍԲԸ ՄԻԻՌՈՆՕՐՀՆՈՒԹԵԱՆ ԱՌԹԻԻ
(29 Սեպտեմբեր 1991 թ.)

«Յանուն Հոր եւ Որդոյ եւ Հոգւոյն Սրբոյ». ամեն:

«Էջ Միածինն ի Հօրէ եւ լոյս փառաց ընդ նմա»:

Սիրեցեալ հոգևոր զաւակներ Մեր,

Այսօր, երբ Սուրբ Էջմիածնի կամարների տակ հաւաքուած, օրհնեցինք սրբալոյս միւռոնը, յիշենք որ շատ դարեր առաջ Սուրբն Գրիգոր՝ մեր Լուսաւորչի հրաշք տեսիլքով, իջաւ այստեղ Որդին Աստուծոյ, Փրկիչն մեր Քրիստոս և նրա հետ՝ նաև լոյսը փառքի:

Այդպէս է, որ Հայաստանում հռչակուեց քրիստոնէական հաւատքը իբրև պաշտօնական կրոնը համայն հայ ազգի, որի ծոցում, դեռևս առաքելական դարից, սկսել էր տարածուել սուրբ Աւետարանի աստուածային խօսքը: Բայց մանաւանդ Սուրբ Գրիգոր Լուսաւորչի քարոզչութեամբ ու հրաշալի գործունէութեամբ, և հայոց Տրդատ թագաւորի դարձով ու մկրտութեամբ, նոր հաւատքը վերջնապէս յաղթանակեց, և հիմքը դրուեց ու կազմակերպուեց Հայաստանեայց Առաքելական Սուրբ Եկեղեցին, կենտրոն ունենալով հենց այս տեղը, ուր իջել էր Միածին Որդին Աստուծոյ:

Այդ օրուանից հայ ժողովրդի հոգու աշխարհը սկսեց շաղախուել Քրիստոսի Աւետարանի լոյսով:

Այդ օրուանից հայ ժողովուրդը սկսեց ապրել հոգևոր նոր վերածընունդ:

Այդ օրուանից հայ ժողովուրդը սկսեց պայծառակերպուել և դառնալ ստեղծարար ազգութիւն:

Վկայ է պատմութիւնը, որ քրիստոնէութեամբ հայ ազգը դարձաւ համաշխարհային երկոյթ:

Այո՛, համաշխարհային երկոյթ, նախ՝ որովհետև նա առաջինը հանդիսացաւ, որ 301 թուականին իր սիրտը բացեց Քրիստոսի Աւետարանի լոյսին ու նոր հաւատքը հռչակեց ազգային պետական կրոն, իսկ հայոց Տրդատ արքան, եղաւ առաջին թագաւորը, որը մկրտուեց քրիստոնէայ:

Ինչպէս յայտնի է, 313 թուականին Հռոմի կայսրը՝ Կոստանդիանոս, Միլանի հրովարտակով քրիստոնէութիւնը հռչակեց լոկ արտօնեալ կրոն Հռոմէական կայսրութեան տարածքի վրայ և ինքը մկրտուեց շուրջ տասը տարի յետոյ միայն:

Հայ ժողովուրդը, քրիստոնէութեամբ, դարձաւ համաշխարհային երկոյթ նաև իր հինգերորդ դարի Ոսկեդարով, երբ աշխարհում կազմաւորուեց ու ճառագայթեց մի նոր մշակոյթ, մի ազգային ինքնատիպ նոր ոգեկանութիւն, որի ստեղծած արժէքները իրենց մնայուն տեղն են գրաւել միջազգային քաղաքակրթութեան պատմութեան մէջ մինչև մեր օրերը:

Եւ վերջապէս հայ ժողովուրդը, քրիստոնէութեամբ դարձաւ համաշխարհային երկոյթ նաև Վարդանանց պատերազմով, որ աշխարհի պատմութեան հորիզոնի վրայ հանդիսացաւ առաջին պատերազմը վասն խղճի, վասն հաւատի ազատութեան: Վարդանանց նահատակութիւնը հայոց պատմութեան մէջ մնաց մինչև մեր օրերը, խորհրդանշելով մեր ազգի ազատատենչ ոգու, մեր ազգի անկախութեան տենչի:

Այս օրերին, երբ մեր մայր հայրենիքը հռչակել է իր պետական ան-

կախութիւնը, Հայ Առաքելական Եկեղեցին բարձրադասակ ողջունում է այդ հռչակումը, այն գիտակցութեամբ, որ ինքը՝ Հայ Եկեղեցին, իր սկզբնաւորման ժամանակներից մինչև մեր ժամանակները պահել-պահպանել է անկախութեան գաղափարը, հոգևոր կեանքի մակարդակի վրայ: Դարեր շարունակ բռնատէրերի լծի տակ հայ հաւատացեալը ինքն իրեն զգացել է ազատ ու անկախ միայն իր մայր Եկեղեցու կամարների ներքոյ:

Արդար է հետևաբար, որ Հայ Եկեղեցին ճանաչուի նախապէս, նախակարապետը մերօրեայ պետական անկախութեան:

Հայ Եկեղեցին, ինքնիշխանութեան ու անկախութեան գաղափարը իրականացրել է դարեր շարունակ նաև այլ Եկեղեցիների հետ իր յարաբերութիւնների ճանապարհին:

Քրիստոնէայ մեծ Եկեղեցիներ, Բիզանդական շրջանից սկսած, յաճախ ձգտել են իշխել Հայ Եկեղեցու և հայ ժողովրդի հոգու վրայ ու խափանել նրա ազգային ոգեկանութեան անկախութիւնը: Այդ տեսակետից Հայ Եկեղեցու պատմութիւնը մի հերոսամարտ է՝ ընդդէմ նման օտար Եկեղեցիների նուաճողական ձգտումների:

Հայ Առաքելական Եկեղեցին այսօր էլ եղբայրական սիրալիր յարաբերութիւններ է կամենում պահել բոլոր քրիստոնէայ քոյր Եկեղեցիների հետ, Էկումենիկ ոգով, սրբութեամբ պահպանելով սակայն իր դաւանանքը և իր ներքին վարչա-կազմակերպչական ազգային անկախութիւնը: Հայ ժողովուրդը երբեք պիտի չկամենայ կախման մէջ լինել այլ եկեղեցական կենտրոններից: Եւ երբեք պիտի չհանդուրժի, որ այլ Եկեղեցիներ մարդորսութեամբ զբաղուեն մեր ազգի ծոցում՝ Հայաստանում թէ սփիւռքում:

Հայ Առաքելական Եկեղեցին հնագոյն վաւերական քրիստոնէական Եկեղեցիներից մէկն է և կարիքը չունի դրսից կրօնական-եկեղեցական ուսմունք ներմուծելու:

Այսօր, մեր անկախ պետութեան հռչակումով, այժմէութիւն է ստանում նաև հայ ազգի Եկեղեցու հոգևոր անկախութեան ամրապնդման հրամայականը, իբրև հայ ժողովրդի միակ հարազատ Եկեղեցին, անկախ օտար կրօնական կենտրոններից:

Մեր նոր ինքնիշխան պետութեան անկախութեան հիմքերից մէկն է նաև հայ ազգի Եկեղեցու անկախութիւնը և ինքնիշխանութիւնը:

Մենք դաւանում ենք Հաւատամքը՝ մէկ ազատ ազգութիւն,

մէկ անկախ պետութիւն,

մէկ անկախ ազգային Եկեղեցի:

Այս հաւատամքով, այս գիտակցութեամբ, Սուրբ Հոգու զօրութեամբ օրհնուած այս սրբալոյս միւռոնը Մենք հռչակում ենք անկախութեան միւռոն:

Հաչեր, հոգևոր զաւակներ Մեր, այս սրբազան միւռոնով՝ միացէ՛ք, եղբայրացէ՛ք, եղէք մէկ կամք, եղէք մէկ ուրախութիւն, եղէք մէկ ցաւ: Եղէք մէկ ազգ, մէկ ընտանիք, մէկ ժայռացած երդում և հաւատացէք մեր այս մի բուռ հայրենի հողին ու նրա գալիքին, սուրբգրական Արարատի հայեացքի տակ, Սուրբ Էջմիածնի օրհնութեան ներքոյ:

«Քանզի ո՛վ է մեր յոյս, կամ խնդութիւն կամ պսակ պարծանաց մերոց, եթէ ոչ դուք ժողովուրդ մեր, առաջի Տեառն մերոյ Յիսուսի Քրիստոսի ի նորա գալստեանն: Զի դուք էք փառք մեր և խնդութիւն» (Ա. Թեաաղ. Բ. 19—20): Այժմ և միշտ. ամէն:

ԸՆԴՈՒՆԵԼՈՒԹՅՈՒՆ ՎԵՀԱՐԱՆՈՒՄ

Սրբալույս մեռոնի օրհնության արարողության ավարտից հետո, Վեհափառ Հայրապետը, եկեղեցական թափորով, «Հայրապետական օրհներգի» վեհաշունչ երգեցողության ներքո, առաջնորդվում է Վեհարան՝ օրվա տոնի առթիվ ընդունելու շնորհավորություններ: Այս առիթով Վեհարանի սեղանատանը տրվում է պաշտոնական ճաշկերույթ, որին մասնակցում են Հայաստանի խորհրդարանի նախագահ Տիար Լևոն Տեր-Պետրոսյանը, պաշտոնական այլ անձինք, քույր Եկեղեցիների պատգամավորներ և ուխտավորներ:

ՀՈԳԵՀԱՆԳՍՏՅԱՆ ԱՂՈԹՔ ԾԻԾԵՌՆԱԿԱԲԵՐԴՈՒՄ

Սեպտեմբերի 30-ին, երկուշաբթի օրը, առավոտյան ժամը 11-ին, Ամենայն Հայոց Վազգեն Ա Կաթողիկոսի գլխավորությամբ, Հայ Եկեղեցու պատգամավորները, քույր Եկեղեցիների ներկայացուցիչներն ու հյուրերը, ծաղիկներով ու ծաղկեպսակներով այցելում են Ծիծեռնակաբերդի հայ մահատակաց հուշարձան:

Նահատակաց հուշարձանի հավերժական կրակի շուրջ բոլորված, Հայ և քույր Եկեղեցիների հոգևոր դասը միասնաբար աղոթում են անմեղ մահատակ հայորդիների հոգիների խաղաղության և հանգստյան համար:

Նույն օրը, ժամը 12-ին, Հայ Եկեղեցու հոգևորականաց դասին և քույր Եկեղեցիների ներկայացուցիչներին ընդունեց Հայաստանի խորհրդարանի նախագահ Տիար Լևոն Տեր-Պետրոսյանը: Նա մեկ անգամ ևս շնորհավորեց Վեհափառ Հայրապետին մեռոնօրհնության առիթով և, բարձր գնահատելով Հայ Եկեղեցու և հոգևորականության դերը մեր ժողովրդի կյանքում, ողջունեց նրա վերազարթոնքի նոր ուղին:

Երեկոյան ժամը 19.30-ին Արամ Խաչատրյանի անվան համերգային սրահում Արարատյան հայրապետական թեմի «Մանկունք» երգչախմբի և Մայր տաճարի երգեցիկ խմբի կատարմամբ տոնական համերգ կազմակերպվեց, որին իրենց օրհնությունն էին քերել Ամենայն Հայոց Հայրապետը, Մեծի Տանն Կիլիկիո Կաթողիկոսը, մեր նվիրապետական մյուս Աթոռների պետերն ու ներկայացուցիչները, թեմակալ առաջնորդները և քույր Եկեղեցիների պատգամավորները:

Հոկտեմբերի 1-ին Վեհարանում, Վեհափառ Հայրապետի բարձր նախագահությամբ, տեղի ունեցավ եպիսկոպոսաց խորհրդակցական ժողով, որտեղ քննարկվեցին մեր Եկեղեցուն և ժողովրդին հուզող տարբեր հարցեր:

Մայր Աթոռ ժամանած հյուրերը հոկտեմբերի 2-ին, հրաժեշտ տալով Ամենայն Հայոց Կաթողիկոսին և շնորհակալություն հայտնելով նրա ջերմ ու հոգատար վերաբերմունքի համար, մեկնում են անմոռաց տպավորություններով:

Մայր Աթոռում գտնվելու շրջանում հյուրերն այցելեցին հանրապետության տեսարժան վայրերը, եղան Գառնիի տաճարում, Ս. Գեղարդա վանքում, Խորվիրապում, Սևանում, այցելեցին թանգարաններ և մշակութային

կենտրոններ, ծանոթացան ինքնիշխան Հայաստանի դժվարություններին և նոր նվաճումներին:

Բոլոր պատգամավորներն ու հյուրերը կարոտակեզ շրթներով համբուրեցին մեր սուրբ վանքերի խնկաբույր քարերը, հոգևոր շունչ ու ջերմություն ստացան հայոց սրբազան հողից և հայրենի աշխարհից հեռացան ապագայի լուսավոր ու գեղեցիկ տեսիլքներով:

